

प्रादेशिक समाचार एकांश
आकाशवाणी रायपुर (छत्तीसगढ़)
प्रादेशिक समाचार बुलेटिन
18.10 सोमवार दिनांक 07.10.2024

प्रमुख समाचार –

- केंद्रीय गृहमंत्री ह आज नई दिल्ली म किहीन कि केंद्र अउ राज्य सरकार मिलके माओवाद के समस्या ल कर सकथे खतम।
- रईपुर के साईस कॉलेज मैदान म तीन दिन तक चलत सशस्त्र सैन्य प्रदर्शनी ह आज सिरागे–समापन मउका म मुख्य अतिथि के रूप म सामिल होइन राज्यपाल।
- प्रवर्तकता अउ मिसन वात्सल्य कारीकरम म अट्टारा बछर ले कम उमर के लइका मन ल इलाज, पढ़ई–लिखई अउ पुष्टई बर हर महिना दे जाही चार हजार रुपिया।

केंद्रीय गृहमंत्री–नक्सलवाद बैठक

केंद्रीय गृहमंत्री अमित शाह ह आज किहीन कि केंद्र अउ राज्य सरकार मिलके जब कोनो योजना ल पूरा करे के काम करथे, त फेर देस ले नक्सलवाद जइसन समस्या ल घलो खतम करे जा सकथे। केंद्रीय गृहमंत्री ह आज नई दिल्ली म वामपंथी उग्रवाद परभावित राज्य मनके मुख्यमंत्री मनके संग एक ठिन समीक्षा बइठका के अगुवई करीन। ओमन किहीन कि माओवादी हिंसा के घटना ह सोलह हजार ले घट के करीबन सात हजार सात सौ होंगे हे। केंद्रीय गृहमंत्री ह किहीन कि माओवाद ह विकास के रद्दा म सबले बड़का रोड़ा हरय। एखर ले कोनो मनखे ल भला नइ होय। श्री शाह ह माओवाद ले जुड़े जम्मो युवा मनले हथियार छोड़के मुख्यधारा म आय के अपील करे हे। ओमन किहीन कि उत्तर पूर्व, जम्मू कश्मीर अउ छत्तीसगढ़ के संगेसंग नक्सल परभावित राज्य मन ले करीबन तेरह हजार युवा मन हथियार छोड़के मुख्यधारा म सामिल होय हे।

बइठका म प्रदेश के मुख्यमंत्री विष्णुदेव साय ह घलो सामिल होइन। ओमन बतइन कि छत्तीसगढ़ म हालेच म नक्सल विरोधी ऑपरेशन म इकतीस झिन माओवादी मन ल मार गिराय गीस।

केंद्रीय गृह मंत्री अमित शाह

बड़का म मुख्यमंत्री ह यहू जानबा दीन, कि दक्षिण बस्तर म जल्दीच उनतीस ठिन नवा सुरक्षा कैंप बनाय जाही।

सैन्य प्रदर्शनी-समापन

रईपुर के साईंस कॉलेज मैदान म चले सशस्त्र सैन्य प्रदर्शनी ह आज सिरागे। ए मउका म राज्यपाल रमेन डेका ह मुख्य अतिथि के रूप म सामिल होइन। समारोह ल संबोधित करत ओमन युवा मन ले आह्वान करीन कि भारतीय सेना ह राष्ट्र सेवा के प्रतीक हरय। एमा सामिल होके राष्ट्र के प्रति अपन कर्तव्य निभावय। समापन समारोह के पहिली राज्यपाल ह सैन्य प्रदर्शनी ल घूम के देखिन। सेना के बड़का अधिकारी मन ह भीष्म टी-नाइंटी टैंक के संगेसंग कतकोन मिसाइल, नवा-नवा लड़ाकू हथियार अउ आने सैन्य उपकरण के बारे म जानबा दीन। राज्यपाल ह सहीद जवान मनके फोटू उपर पुष्पांजलि चढ़ाके ओमन ल नमन करीन।

सैन्य प्रदर्शनी के आखिरी दिन एनसीसी कैडेट मन ह घुड़संवारी प्रदर्शन, सैनिक मन ह डेयर डेविल मोटरसाइकिल सो अउ गोरखा रेजिमेंट के दल मन ह खुखरी डांस करके लोगन मन ल उछाह ले भर दीन। ए मउका म उप मुख्यमंत्री अरुण साव ह छत्तीसगढ़ अउ ओडिसा उप क्षेत्र के ब्रिगेडियर अमन आनंद ल छत्तीसगढ़ शासन कोति ले मान पत्र अउ स्मृति चिन्ह दे गीस।

नारायणपुर-सुरक्षा कैंप

नारायणपुर जिला के गांव होरादी म “जनसुविधा अउ सुरक्षा कैम्प” बनाय गेहे। सिविर के बने ले ए जघा म माओवाद विरोधी अभियान चलाय म मदद मिलही। संगेसंग रद्दा, पूल-पुलिया, पढई-लिखई, इलाज, मोबाइल नेटकर्व अउ आने जरूरी सुविधा के विस्तार घलो होही। माओवाद परभावित ए क्षेत्र म तीस साल ले बंद पड़े रद्दा उपर नारायणपुर ले गांव होरादी तक रोजे बस चलाय जा सकही। एखर तियारी पूरा कर ले गेहे। जानबा के मुताबिक नारायणपुर पुलिस डहार ले माओवाद मुक्त सशक्त बस्तर के सपना ल पूरा करे बर क्षेत्र म सरलग माओवाद विरोधी “माड़ बचाव” अभियान चलाय जावत हे।

कृषिमंत्री-बैठक

केंद्रीय कृषि मंत्री शिवराज सिंह चौहान ह किहीन हे कि केंद्र सरकार ह देस म कृषि प्रणाली ल बढ़िया बनाय बर काम करत हे। नई दिल्ली म आज किसान अउ किसान संगठन मनके संग बइठका के बाद ओमन किहीन कि सरकार ह किसान मन बर कृषि विकास योजना अउ फसल बीमा योजना जइसन कतकोन फइसला लेहे।

प्रवर्तकता और मिशन वात्सल्य-राशि

प्रवर्तकता अउ मिसन वात्सल्य कारीकरम म अट्टारा बछर ले कम उमर के लइका मन ल इलाज, पढई-लिखई अउ पुष्टई बर हर महिना चार हजार रुपिया के वित्तीय मदद दे जाही। प्रवर्तकता ल दू श्रेणी म बांटे गेहे, जेमा निवारक श्रेणी म चार हजार अउ पुर्नवास श्रेणी के तहत पीएम केयर्स फॉर चिल्ड्रन योजना के हितग्राही लइका मन ल हर महिना चार हजार रुपिया दे जाही। संगेसंग जिला बाल संरक्षण इकाई डहार ले अइसन परिवार या लइका मनके चिन्हारी सामाजिक कार्यकर्ता, आऊटरीच वर्कर, स्वयं सेवक, वार्ड समिति या ग्राम पंचायत के मदद ले करे जाही।

बेवरेजेस कार्पोरेशन-बैठक

स्वास्थ्य मंत्री श्याम बिहारी जायसवाल ह आज रईपुर म छत्तीसगढ़ स्टेट बेवरेजेस कार्पोरेशन के संचालक मंडल के बइठका लीन। ए बइठका म बेवरेजेस कार्पोरेशन के कतकोन एजेंडा उपर गोठबात करे के संगेसंग इक्कीस अगस्त के होय बइठका म लेगे फइसला के प्रतिवेदन ल घलो पेस करे गीस। उहें, वित्तीय वर्ष दू हजार तेईस-चौबीस के वित्तीय विवरण मनके घलो अनुमोदन करे गीस। बइठका म मनेंद्रगढ़ म बेवरेज डिपो या गोदाम खोले उपर सहमति बन गेहे। इंहा ले चार जिला मन ल आपूर्ति करे जाही।

किसान-ठगी

छत्तीसगढ़ लोकसेवा आयोग के माध्यम ले नायब तहसीलदार बनाय के झांसा देके एक झिन दंपत्ति ह दुरुग के किसान ले उनतीस लाख रुपिया ले जादा के ठगी करे हे। दुरुग कोतवाली थाना प्रभारी ह बतइन कि गांव मोहलाई के रहइया किसान नोखेलाल सिन्हा ह अपन दरज सिकइत म बतइन कि ओमन ह खेती-किसानी के कामकाज के संगेसंग छत्तीसगढ़ पीएससी के तियारी करत हे। किसान ह आरोप लगाय हे कि मोहंदी के रहइया एक झिन दंपत्ति ह ओखर संग साढ़े उनतीस लाख रुपिया के ठगी करे हे। ओमन नायब तहसीलदार के पद म नौकरी लगाय के नाव उपर उनतीस लाख पचास हजार रुपिया ले हवय। पुलिस डहार ले दूनो आरोपी मनके खिलाफ एफआईआर दरज करके मामला के जांच करत हे।

उहें, गौरेला-पेण्ड्रा-मरवाही जिला म सीआईएसएफ के एक झिन जवान ले लाखो रुपिया के ठगी करे के मामला आगू आय हे। महिला आरोपी ह खुद ल टीटीई बताके नौकरी लगवाय के नाव म जवान ले ढाई लाख रुपिया के ठगी कर लीन। पेण्ड्रा थाना पुलिस ह आरोपी माईलोगिन ल गिरफ्तार करके न्यायालय म पेस करीन। जिहां ले ओमन ल न्यायिक रिमांड म भेज दे गेहे। पुलिस के मुताबिक ए आरोपी माईलोगिन ह दू बार ठगी के काम कर चुके हे।

दुर्घटना

जांजगीर-चांपा जिला के कुटराबोड़ गांव म आज एक टिन पिकअप के चपेट म आय ले छै झिन लइका मन घायल होगे। घटना म घायल चार झिन लइका मन ल बिलासपुर अउ चांपा के अस्पताल म रिफर करे गेहे। घटना के बाद ले पिकअप गाड़ी के ड्राइवर भाग गेहे। पामगढ़ पुलिस ह घटना के जांच करत हे।

मौसम

प्रदेस म बंगाल के खाड़ी ले नमी आय के सेती काली एक दू जघा म हल्का बरसा होय या गरज-चमक के संग बूदा-बांदी होय के संभावना हे। मौसम विभाग ह कोनो-कोनो जघा म गाज गिरे अउ हवा गरेर चले के चेतावनी देहे।

संक्षिप्त समाचार

- महिला अउ बाल विकास मंत्री लक्ष्मी राजवाड़े ह आज सूरजपूर जिला के लटोरी म नवा तहसील आफिस के सुभारंभ करीन।
- सक्ति जिला म महानदी म बूड़े एक झिन मनखे के शव ल एसडीआरएफ के टीम ह बाहिर निकाल लेहे। पुलिस के मुताबिक ए मनखे ह अपन संगवारी संग घूमे बर गे रिहीन नहावत बेरा नदिया म बूड़ गे।
